

四庫全書

史部

欽定四庫全書

宋書卷九

梁

沈

約

撰

本紀第九

後廢帝

廢帝諱昱字德融小字慧震明帝長子也大明七年正月辛丑生於衛尉府太宗諸子在孕皆以周易筮之即以所得之卦為小字故帝字慧震其餘皇子亦如之泰

始二年立為皇太子三年始制太子改名昱安車乘象輅六年出東宮又制太子元正朝賀服袞冕九章衣泰豫元年四月己亥太宗崩庚子太子即皇帝位大赦天下尚書令袁粲護軍將軍褚淵共輔朝政乙巳以護軍將軍張永為右光祿大夫撫軍將軍安成王為揚州刺史己酉特進右光祿大夫劉遵考改為左光祿大夫五月丁巳以吳興太守張岱為益州刺史戊辰緣江戍兵老疾者悉聽還班劍依舊入殿六月壬辰詔曰夫興王

經制實先民隱方求廣教刑於四維朕以玆眇夙膺寶  
歷永言民政未接聽覽眷言乃顧無忘鑒寐可遣大使  
分行四方觀採風謠問其疾苦有拂民法不便俗者悉  
各條奏若守宰威恩可紀廉勤允著依事騰聞如獄訟  
誣枉識事紕繆情公存私害民利已者無或隱昧廣納  
芻輿之議博求獻藝之規巡省之道務令精洽深簡行  
識俾若朕親覽焉又詔曰夫寢夢期賢往誥垂美物色  
求良前書稱盛朕以冲昧嗣膺寶業思仰述聖猷勉弘

政道興言多士常想得人可普下牧守廣加搜採其有  
孝友聞族義讓光閭或匿名屠釣隱身耕牧足以整厲  
澆風扶益淳化者凡厥一善咸無遺逸虛輪佇帛俟聞  
嘉薦京師雨水詔賑卹二縣貧民乙巳尊皇后曰皇太  
后立皇后江氏秋七月戊辰崇拜帝所生陳貴妃為皇  
太妃閏月丁亥罷宋安郡還屬廣興己丑割南豫州南  
汝陰郡屬西豫州西豫州廬江郡屬豫州甲辰以新除  
征西將軍開府儀同三司荊州刺史蔡興宗為中書監

光祿大夫安西將軍郢州刺史沈攸之為鎮西將軍荊  
州刺史南徐州刺史劉秉為平西將軍郢州刺史新除  
太常建平王景素為鎮軍將軍南徐州刺史八月戊午  
新除中書監左光祿大夫開府儀同三司蔡興宗薨冬  
十月辛卯撫軍將軍劉韞有罪免官辛未護軍將軍褚  
淵母憂去職十一月己亥新除平西將軍郢州刺史劉  
秉為尚書左僕射辛丑護軍將軍褚淵還攝本任為  
國高麗國遣使獻方物十二月索虜寇義陽丁巳司州

刺史王瞻擊破之

元徽元年春正月戊寅朔改元大赦天下壬寅詔曰夫  
緩法昭恩裁風茂典蠲憲貸責訓俗彝義朕臨馭宸樞  
黃制氓寓式存寬簡思孳矜惠今開元肆宥萬品惟新  
凡茲流斥宜均弘洗自元年以前貽罪徙放者悉聽還  
本土二月乙亥以晉熙王燮為郢州刺史三月丙申以  
撫軍長史何恢為廣州刺史婆利國遣使獻方物戊戌  
以前淮南太守劉靈遺為南豫州刺史夏五月辛卯以

輔師將軍李安民為司州刺史丙申河南王遣使獻方  
物六月壬子以越州刺史陳伯紹為交州刺史乙卯特  
進左光祿大夫劉遵考卒壽陽大水己未遣殿中將軍  
賑卹慰勞丙寅以左軍將軍孟次陽為兗州刺史秋七  
月丁丑散騎常侍顧長康長水校尉何翌之表上所撰  
諫林上自虞舜下及晉武凡十二卷八月辛亥詔曰分  
方正俗著自虞冊川谷異制煥乎姬典故并遂有辨閭  
伍無雜用能七教克宣八政斯序雖綿代殊軌沿革異



儀或民懷遷俗或國尚興徙漢陽列燕代之豪關西熾  
齊楚之族並通籍新邑即居成舊洎金行委御禮樂南  
移中州黎庶襁負揚越聖武造運道一閱區貽長世之  
規申土斷之制而夷險相因盈晦迭襲歲饉凋流戎役  
情散違鄉寓境漸至繁積宜式遵鴻軌以為永憲庶阜  
俗昌民反風定保夷胥山之險澄瀚海之波括河圖於  
九服振玉輶於五都矣秘書丞王儉表上所撰七志三  
十卷京師旱甲寅詔曰比亢序愆度留熏燿晷有傷秋

稼方貽民瘼朕以眇疚未弘政道圉圉尚繁枉滯猶積  
夕厲晨矜每惻于懷尚書令可與執法以下就訊衆獄  
使寃訟洗遂困弊昭蘇頒下州郡咸令無壅癸亥鎮軍  
將軍南徐州刺史建平王景素進號鎮北將軍庚午陳  
留王曹鈺薨九月壬午詔曰國賦氓稅蓋有恒品往屬  
戎難務先軍實徵課之宜或乖昔准湘江二州糧運偏  
積調役既繁庶徒彌擾因循權政容有未草民單力弊  
歲月愈甚永言矜歎情兼宵寐可遣使到所明加詳察

其輸違舊令後非公限者並即蠲改具條以聞丁亥立  
衡陽王疑子伯玉為南平王冬十月壬子以撫軍司馬  
王玄載為梁南秦二州刺史癸酉割南兗州之鍾離豫  
州之馬頭又分秦郡梁郡歷陽置新昌郡立徐州十一  
月丙子以散騎常侍垣閎為徐州刺史丁丑尚書令袁  
粲母喪去職十二月癸卯朔日有蝕之乙巳司空江州  
刺史桂陽王休範進位太尉尚書令袁粲還攝本任加  
號衛將軍癸亥立前建安王世子伯融為始安縣王丙

寅河南王遣使獻方物

二年春正月庚子以右光祿大夫張永為征北將軍南  
兗州刺史二月己巳加護軍將軍褚淵中軍將軍三月  
癸酉以左衛將軍王寬為南豫州刺史夏四月癸亥詔  
曰頃列爵叙勲銓榮酬義條流積廣又各淹闕歲往事  
留理至逋壅在所參差多違甄飭賞未均洽每疚厥心  
可悉依舊准並下注職五月壬子太尉江州刺史桂陽  
王休範舉兵反庚寅內外戒嚴加中領軍劉劭鎮軍將

軍加右衛將軍齊王平南將軍前鋒南討出屯新亭征北將軍張永屯白下前南兗州刺史沈懷明戍石頭衛將軍袁粲中軍將軍褚淵入衛殿省壬辰賊奄至攻新亭壘齊王拒擊大破之越騎校尉張敬兒斬休範賊黨杜黑蠡丁文豪分軍向朱雀航劉劭拒賊敗績力戰死之右軍將軍王道隆奔走遇害張永潰於白下沈懷明自石頭奔散戊午撫軍典籤茅恬開東府納賊賊入屯中堂羽林監陳顯達擊大破之丙申張敬兒等破賊於

宜陽門莊嚴寺小市進平東府城梟擒羣賊賞賜封爵  
各有差丁酉詔京邑二縣埋藏所殺賊并戰亡者復同  
京城是日解嚴大赦天下文武賜位一等戊戌原除江  
州逋債其有課非常調役為民蠹者悉皆蠲停詔曰頃  
國賦多蹇公儲罕給近治戎雖淺而軍費已多廩藏虛  
罄難用馭遠宜矯革淫長務在節儉其供奉服御悉就  
減撤雕文靡麗廢而勿脩凡諸游費一皆禁斷外可詳  
為科格荊州刺史沈攸之南徐州刺史建平王景素郢

州刺史晉熙王燮湘州刺史王僧虔雍州刺史張興世  
並舉義兵赴京師己亥以第七皇弟友為江州刺史芮  
芮國遣使獻方物六月庚子以平南將軍齊王為中領  
軍鎮軍將軍南兗州刺史癸卯晉熙王燮遣軍剋尋陽  
江州平戊申以淮南太守任農夫為豫州刺史右將軍  
南豫州刺史王寬進號平西將軍壬戌改輔師將軍還  
為輔國秋七月庚辰立第七皇弟友為邵陵王辛己以  
撫軍司馬孟次陽為兗州刺史乙酉鎮西將軍荊州刺

史沈攸之進號征西大將軍鎮北將軍徐州刺史建平  
王景素進號征北將軍並開府儀同三司征虜將軍郢  
州刺史晉熙王燮進號安西將軍前將軍湘州刺史王  
僧虔進號平南將軍八月辛酉以征虜行參軍劉延祖  
為寧州刺史九月壬辰以遊擊將軍呂安國為兗州刺  
史丁酉以尚書令新除衛將軍袁粲為中書監即本號  
開府儀同三司領司徒加護軍將軍褚淵尚書令撫軍  
將軍揚州刺史安成王進號車騎將軍冬十月庚申以



新除侍中王渙為湘州刺史甲子以遊擊將軍陳顯達為廣州刺史十一月丙戌御加元服大赦天下賜民男子爵一級為父後及三老孝悌力田者爵二級鰥寡孤獨篤癃不能自存者穀五斛年八十以上加帛一匹大酺五日賜王公以下各有差十二月癸亥立第八皇弟躋為江夏王第九皇弟贊為武陵王

三年春正月辛巳車駕親祠南郊明堂三月丙寅河南王遣使獻方物巳巳以車騎將軍張敬兒為雍州刺史

其日京師大水遣尚書郎官長檢行賑賜閏月戊戌詔  
曰頃民俗滋弊國度未殷歲時屢騫編戶不給且邊虞  
尚警徭費彌繁永言夕惕寢興增疚思弘豐耗之制以  
惇約素之風庶侍蓄拯民以康治道大官珍膳御府麗  
服諸所供擬一皆減撤可詳為其格務從簡衷夏四月  
遣尚書郎到諸州檢括民戶窮老尤貧者蠲除課調丁  
壯猶有生業隨宜寬申貲財足以克限者督令洗畢丙  
戌車駕幸中堂聽訟六月癸未北國使至兼司徒袁粲

尚書令褚淵並固讓秋七月庚戌以粲為尚書令壬戌  
以給事黃門侍郎劉懷珍為豫州刺史八月庚子加護  
軍將軍褚淵中書監九月丙辰征西大將軍河南王吐  
谷渾拾寅進號車騎大將軍冬十月丙戌高麗國遣使  
獻方物十二月乙丑以冠軍將軍姚道和為司州刺史  
四年春正月己亥車駕躬耕籍田大赦天下賜力田爵  
一級貸貧民糧種壬子以梁南秦二州刺史王玄載為  
益州刺史二月壬戌以步兵校尉范栢年為梁南秦二

州刺史丁卯加金紫光祿大夫王琨特進夏五月以寧  
朔將軍武都王楊文度為北秦州刺史乙未尚書右丞  
虞玩之表陳時事曰天府虛散垂三十年江荆諸州稅  
調本少自頃以來軍募多乏其穀帛所入折供文武豫  
究司徐開口待哺西北戎將裸身求衣委輸京都益為  
寡薄天府所資唯有淮海民荒財單不及曩日而國度  
引費四倍元嘉二衛臺坊人力五不餘一都水材官朽  
散十不兩存備豫都庫材竹俱盡東西二塢塼瓦雙匱

敕令給賜悉仰交市尚書省舍日就傾頽第宅府署類多穿毀視不遑救知不暇及尋所入定調用恒不周既無諸畜理至空盡積弊累耗鍾於今日昔歲奉敕課以揚徐衆逋凡入米穀六十萬斛錢五千餘萬布絹五萬匹雜物在外賴此相贍故得推移即今所懸轉多興用漸廣深懼供奉頓闕軍器輟功將士飢怨百官騫祿署府謝雕麗之器土木停緹紫之容國戚無以贍勲求無以給如愚管所慮不月則歲矣經國遠謀臣所不敢言

朝夕祇勤心存於匪懈起伏震遽事屬冒聞伏願陛下  
留須臾之鑒垂永代之計發不世之詔施必行之典則  
氓祇齊懼高卑同泰帝優詔答之庚戌以驍騎將軍曹  
欣之為徐州刺史六月乙亥加鎮軍將軍齊王尚書左  
僕射秋七月戊子征北將軍南徐州刺史建平王景素  
據京城反己丑內外纂嚴遣驍騎將軍任農夫領軍將  
軍黃回北討鎮軍將軍齊王總統衆軍曲赦南徐州始  
安王伯融都鄉侯伯猷賜死辛卯豫州刺史段佛榮統

前鋒馬步衆軍甲午軍主左軍將軍張保戰敗見殺黃  
回等至京城與景素諸軍戰連破之乙未尅京城斬景  
素同逆皆伏誅其日解嚴丙申大赦天下封賞各有差  
原京邑二縣元年以前逋調辛丑以武陵王贊為南徐  
州刺史八月丁卯立第十皇弟勰為南陽王第十一皇  
弟嵩為新興王第十二皇弟禧為始建王庚午以給事  
黃門侍郎阮佃夫為南豫州刺史乙酉以行青冀二州  
刺史劉善明為青冀二州刺史九月丁亥割郢州之隨

郡屬司州戊子驍騎將軍高道慶有罪賜死己丑車騎將軍揚州刺史安成王進號驃騎大將軍開府儀同三司安西將軍郢州刺史晉熙王燮進號征西將軍冬十月辛酉以吏部尚書王僧虔為尚書右僕射宕昌王梁彌機為安西將軍河涼二州刺史丙寅中書監護軍將軍褚淵母憂去職十一月庚戌詔攝本任

五年春二月壬申以建寧太守柳和為寧州刺史四月甲戌豫州刺史阮佃夫步兵校尉申伯宗朱幼謀廢立



佃夫幼下獄死伯宗伏誅五月己亥以左軍將軍沈景德為交州刺史驃騎將軍全景文為南豫州刺史丙午以屯騎校尉孫曇瓘為越州刺史六月甲戌誅司徒左長史沈勃散騎常侍杜幼文遊擊將軍孫超之長水校尉杜叔文大赦天下七月戊子夜帝殞於仁壽殿時年十五己丑皇太后令曰衛將軍領軍中書監八座昱以冢嫡嗣登皇統庶其體識日弘社稷有寄豈意窮凶極悖自幼而長善無細而不違惡有大而必蹈前後訓誘

常加隱蔽險戾難移日月滋甚棄冠毀冕長襲戎衣犬  
馬是狎鷹隼是愛皂櫪軒殿之中韝縹宸扆之側至乃  
單騎遠郊獨宿深野手揮矛鉞躬行剗斫白刃為弄器  
斬害為恒務捨交戟之衛委天畢之儀趨步闌闌酣謔  
壚肆宵遊忘返宴寢營舍奪人子女掠人財物方筭所  
不書振古所未聞沈勃儒士孫超功臣幼文兄弟並豫  
勲効四人無罪一朝同戮飛鏃鼓劒孩稚無遺屠裂肝  
腸以為戲謔投骸江流以為懽笑又淫費無度帑藏空

竭橫賦闕河專充別蓄黔首嗷嗷厝生無所吾與其所  
生每厲以義方遂謀酖毒將騁凶忿沈憂假日慮不終  
朝自昔辛癸爰及幽厲方之於此未譬萬分民怨既深  
神怒已積七廟阽危四海褫氣廢昏立明前代令範况  
廼滅義反道天人所棄豐深牧野理絕桐宮故密令蕭  
領軍潛運明略幽顯協規普天同泰驃騎大將軍安成  
王體自太宗天挺淹叡風神凝遠德映在田地隆親茂  
皇歷攸歸億兆係心含生屬望宜光奉祖宗臨享萬國

便依舊典以時奉行未亡人追往傷懷永言感絕太后  
又令曰昱窮凶極暴自取灰滅雖曰罪招能無傷悼棄  
同品庶顧所不忍可特追封蒼梧郡王葬丹陽秣陵縣  
郊壇西初昱在東宮年五六歲時始就書學而情業好  
嬉戲主師不能禁好緣漆帳竿去地丈餘如此者半食  
久乃下年漸長喜怒乖節左右有失旨者輒手加撲打  
徒跣蹲踞以此為常主師以白太宗上輒敕昱所生嚴  
加捶訓及嗣位內畏太后外憚諸大臣猶未得肆志自

加元服變態轉興內外稍無以制三年秋冬間便好出  
遊行太妃每乘青篋車隨相檢攝昱漸自放恣太妃不  
復能禁單將左右棄部伍或十里二十里或入市里或  
往營署日暮乃歸四年春夏此行彌數自京城尅定意  
志轉驕於是無日不出與左右人解僧智張五兒恒相  
馳逐夜出開承明門夕去晨反晨出暮歸從者並執鋌  
矛行人男女及犬馬牛驢值無免者民間擾懼晝日不  
敢開門道上行人殆絕常著小袴褶未嘗服衣冠或有

忤意輒加以虐刑有白梃數十枚各有名號鉞椎鑿鋸之徒不離左右嘗以鐵椎椎人陰破左右人見之有斂眉者昱大怒令此人袒胛正立以矛刺胛洞過於耀靈殿上養驢數十頭所自乘馬養於御林側先是民間訛言謂太宗不男陳太妃本李道兒妾道路之言或云道兒子也昱每出入去來常自稱劉統或自號李將軍與右衛翼輦營女子私通每從之遊持數千錢供酒肉之費阮佃夫腹心人張羊為佃夫所委信佃夫敗叛走後

捕得昱自於承明門以車轢殺之杜延載沈勃杜幼文  
孫超皆躬運矛鉞手自鬻割執幼文兄叔文於玄武湖  
北昱馳馬執稍自往刺之制露車一乘其上施蓬乘以  
出入從者不過數十人羽儀追之恒不及又各慮禍亦  
不敢追尋唯整部伍別在一處瞻望而已凡諸鄙事過  
目則能鍛鍊金銀裁衣作帽莫不精絕未嘗吹篪執管  
便韻天性好殺以此為懽一日無事輒慘慘不樂內外  
百司人不自保殿省憂遑夕不及旦齊王順天人之心

潛圖廢立與直閣將軍王敬則謀之七月七日昱乘露  
車從二百許人無復鹵簿羽儀往青園尼寺晚至新安  
寺就曇度道人飲酒醉夕扶還於仁壽殿東阿氈幄中  
卧時昱出入無恒省内諸閣夜皆不閉且羣下畏相逢  
值無敢出者宿衛並逃避内外無相禁攝王敬則先結  
昱左右楊玉夫楊萬年呂欣之湯成之陳奉伯張石留  
羅僧智鍾千載嚴道福雷道賜戴昭祖許啓戚元寶盛  
道泰鍾千秋王天寶公上延孫俞成錢道寶馬敬之陳



寶直吳璩之劉印魯唐天寶俞孫等二十五人謀共取  
昱其夕敬則出外玉夫見昱醉熟無所知乃與萬年同  
入氈幄內以昱防身刀斬之奉伯提昱首依常行法稱  
敕開承明門出以首與敬則馳至領軍府以首呈齊王  
王乃戎服率左右數十人稱行還開承明門入昱他夕  
每開門門者震懾不敢視至是弗之疑齊王既入曉乃  
奉太后令奉迎安成王

史臣曰喪國亡家之主雖適末同途發軔或異也前廢

帝卑遊褻幸皆龍駕帝飾傳警清路蒼梧王則藏璽懷  
紱魚服忘反危冠短服匹馬孤征至於殞身覆祚其理  
若一姬夏之隆質文異尚忘國之道其亦然乎

宋書卷九

宋書卷九考證

後廢帝紀張敬兒等破賊於宜陽門莊嚴寺○宜一本作宣鄱陽王傳亦作宣

豫州刺史段佛榮統前鋒馬步衆軍○段諸本俱訛殿或誤為殷今據建平王傳改正

晉熙王燮進號征西將軍○征西一本作鎮西與晉熙王傳合當從之

宋書卷九考證

欽定四庫全書

宋書卷十

梁

沈

約

撰

本紀第十

順帝

順皇帝諱準字仲謀小字智觀明帝第三子也泰始五年七月癸丑生七年封安成王食邑三千戶仍拜撫軍將軍置佐史廢帝即位為揚州刺史元徽二年進號車

騎將軍都督揚南豫二州諸軍事給鼓吹一部刺史如故四年又進號驃騎大將軍開府儀同三司班劍三十人都督刺史如故元徽五年七月戊子夜廢帝殞奉迎王入居朝堂壬辰即皇帝位昇明元年改元大赦天下賜文武位二等甲午鎮軍將軍齊王出鎮東城輔政作相丙申詔曰露臺息構義光漢德雉裘焚制事隆晉道故以檢奢軌化敦儉馭俗頃旬服未靜師旅連年委蓄屢空勞敝莫偃而丹雘之飾糜耗難訾寶輅之費徵賦

靡計今車服儀制實宜約損使徽章有序勿得侈溢可  
罷省御府二署凡工麗彫鐫傷風毀治一皆禁斷庶永  
昭憲則弘茲始政征西大將軍荊州刺史沈攸之進號  
車騎大將軍開府儀同三司尚書左僕射中領軍鎮軍  
將軍南兖州刺史齊王為司空錄尚書事驃騎大將軍  
刺史如故中書令衛將軍開府儀同三司撫軍將軍劉  
秉為尚書令加中軍將軍安西將軍郢州刺史晉熙王  
燮為撫軍將軍揚州刺史南陽王翽為郢州刺史辛丑



尚書右僕射王僧虔為尚書僕射右衛將軍劉韞為中  
領軍金紫光祿大夫王琨為右光祿大夫給司空齊王  
錢五百萬布五千匹癸卯車駕謁太廟丙午以安西參  
軍明慶符為青冀二州刺史武陵王贊為郢州刺史新  
除郢州刺史南陽王勰為湘州刺史司空南兗州刺史  
齊王改領南徐州刺史征虜將軍李安民為南兗州刺  
史雒州大水八月壬子遣使賑卹蠲除稅調以驃騎長  
史劉澄之為南豫州刺史山陽太守于天寶新吳縣子

秦立有臯下獄死戊午改平準署辛酉以宣城太守李  
靈謙為兗州刺史癸亥司空袁粲鎮石頭丁卯原除元  
年以前逋調復郡縣祿田戊辰崇拜帝所生陳昭華為  
皇太妃庚午司空長史謝朏衛軍長史江斆中書侍郎  
褚炫武陵王文學劉侯入直殿省參侍文義齊王固讓  
司空庚辰以為驃騎大將軍開府儀同三司九月己丑  
詔曰昔聖王既沒淳風已衰龜書永湮龍圖長秘故三  
代之末德刑相擾世淪物競道陂人諛然猶正士比轂

奇才接軫朕襲運金樞纂靈瑤極負宸巡政日晏忘疲  
永言興替望古盈慮姬夏典載猶傳緇帙漢魏餘文布  
在方冊故元封興茂才之制地節初獨行之品振維務  
本存乎得人今可宣下州郡搜揚幽仄標采鄉邑隨名  
薦上朕將親覽甄其茂異庶野無遺彥永激遐芬己酉  
廬陵王曷薨冬十一月己酉倭國遣使獻方物丙午員  
外散騎侍郎胡羨生行越州刺史以交州刺史沈景德  
為廣州刺史十二月丁巳以驍騎將軍王廣之為徐州

刺史車騎大將軍荊州刺史沈攸之舉兵反丁卯錄公  
齊王入守朝堂侍中蕭嶷鎮東府戊辰内外纂嚴己巳  
以郢州刺史武陵王贊為安西將軍荊州刺史征虜將  
軍雒州刺史張敬兒進號鎮軍將軍右衛將軍黃回為  
平西將軍郢州刺史督諸軍前鋒南討征虜將軍呂安  
國為湘州刺史都官尚書王寬加平西將軍庚午新除  
左衛將軍齊王世子奉新除撫軍將軍揚州刺史晉熙  
王燮鎮尋陽之盆城壬申以驍騎將軍周槃龍為廣州

刺史是日司徒袁粲據石頭反尚書令劉秉黃門侍郎  
劉述冠軍王渙率衆赴之黃回及輔國將軍孫曇瓘屯  
騎校尉王宜興輔國將軍任侯伯左軍將軍彭文之密  
相響應中領軍劉韞直閣將軍卜伯興在殿內同謀錄  
公齊王誅韞等於省內軍主蘇烈王天生薛道淵戴僧  
靜等陷石頭斬粲於城內秉述渙踰城走追擒之並伏  
誅其餘無所問豫州刺史劉懷珍雖州刺史張敬兒廣  
州刺史陳顯達並舉義兵司州刺史姚道和梁州刺史

范栢年湘州行事庾佩玉擁衆懷貳甲戌大赦天下乙亥以尚書僕射王僧虔為尚書左僕射新除中書令王延之為尚書右僕射吳郡太守劉遐據郡反輔國將軍張瓌討斬之閏月辛巳屯騎校尉王宜興有梟伏誅癸巳沈攸之攻圍郢城前軍長史柳世隆固守攸之弟登之作亂於吳興吳興太守沈文秀討斬之己亥內外戒嚴假錄公齊王黃鉞辛丑寧朔將軍北秦州刺史武都王楊文慶進號征西將軍乙巳錄公齊王出頓新亭

二年春正月沈攸之遣將公孫方平據西陽辛酉建寧  
太守張謨擊破之丁卯沈攸之自郢城奔散己巳華容  
縣民斬送之左將軍豫州刺史劉懷珍進號平南將軍  
辛未鎮軍將軍雒州刺史張敬兒克江陵斬攸之子光  
琰荊州平同逆皆伏誅丙子解嚴以新除侍中柳世隆  
為尚書右僕射是日錄公齊王旋鎮東府丁丑以江州  
刺史邵陵王友為安南將軍豫州刺史左衛將軍齊王  
世子為江州刺史侍中蕭嶷為領軍鎮軍將軍雒州刺

史張敬兒進號征西將軍平西將軍郢州刺史黃回進  
號鎮西將軍二月庚辰以尚書左僕射王僧虔為尚書  
令尚書右僕射王延之為尚書左僕射癸未錄公齊王  
加授太尉衛將軍褚淵為中書監司空甲申曲赦荊州  
丙戌撫軍將軍揚州刺史晉熙王燮進號中軍將軍開  
府儀同三司戊子蠲雒州緣沔居民前被水災者租布  
三年辛卯郢州刺史新除鎮南將軍黃回為鎮北將軍  
南兖州刺史南兖州刺史李安民為郢州刺史癸巳以



山陰令傅琰為益州刺史丙申左軍將軍彭文之有臯  
下獄死行湘州事任侯伯殺前湘州行事庾佩玉傳首  
京邑三月庚戌以廣州刺史周槃龍為司州刺史輔國  
將軍劉悛為廣州刺史丙子給太尉齊王羽葆鼓吹夏  
四月己卯以遊擊將軍垣崇祖為兗州刺史辛卯新除  
鎮北將軍南兗州刺史黃回有臯賜死甲午輔國將軍  
淮南宣城二郡太守蕭映行南兗州刺史五月戊午倭  
國王武遣使獻方物以武為安東大將軍輔國將軍行

湘州事任侯伯有辜伏誅六月己丑以前新會太守趙  
超民為交州刺史丁酉以輔國將軍楊文弘為北秦州  
刺史封武都王八月辛卯太尉齊王表斷奇飾麗服凡  
十有四條乙未以江州刺史齊王世子為領軍將軍撫  
軍將軍丙申以領軍蕭嶷為江州刺史九月乙巳朔日  
有蝕之丙午加太尉齊王黃鉞都督中外諸軍事太傅  
領揚州牧劔履上殿入朝不趨贊拜不名置左右長史  
司馬從事中郎掾屬各四人中軍將軍揚州刺史晉熙

王燮為司徒戊申行南兗州刺史蕭映為南兗州刺史  
甲寅給太傅齊王三望車己未為國遣使獻方物癸  
酉武陵內史張澹有臯下獄死冬十月丁丑寧朔將軍  
淮南宣城二郡太守蕭晃為豫州刺史孫曇瓘先逃亡  
己卯擒獲伏誅壬寅立皇后謝氏減死罪一等五歲刑  
以下悉原十二月壬子立故武昌太守劉琨息頌為南  
豐縣王癸亥臨澧侯劉晃謀反晃及黨與皆伏誅甲子  
改封南陽王翽為隨郡王改隨陽郡十二月丙戌皇后

見于太廟戊子高麗國遣使獻方物

三年春正月甲辰以江州刺史蕭巖為鎮西將軍荊州  
刺史尚書左僕射王延之為安南將軍江州刺史安西  
長史蕭順之為郢州刺史乙卯太傅齊王表諸負官物  
質役者悉原除辛亥以驍騎將軍王玄邈為梁南秦二  
州刺史領軍將軍撫軍將軍齊王世子加尚書僕射進  
號中軍大將軍開府儀同三司丙辰加太傅齊王前部  
羽葆鼓吹丁巳詔太傅府依舊辟召以征西將軍雒州

刺史張敬兒為護軍將軍新除給事黃門侍郎蕭諱為  
雖州刺史二月丙子安南將軍南豫州刺史邵陵王友  
薨三月癸卯朔日有蝕之甲辰崇太傅為相國總百揆  
封十郡為齊公備九錫之禮加璽紱遠游冠位在諸王  
上加相國綠綬綬其驃騎大將軍揚州牧南徐州刺史  
如故丙午以中軍大將軍諱為南豫州刺史齊公世子  
副貳相國綠綬綬庚戌臨川王綽謀反綽及黨與皆伏  
誅丁巳以齊國初建給錢五百萬布五千匹絹千匹夏

四月壬申進齊公爵為齊王增封十郡甲戌安西將軍  
武陵王贊薨丙戌命齊王冕十有二旒建天子旌旗出  
警入蹕乘金根車駕六馬備五時副車置旒頭雲罕樂  
僂八佾設鐘簴宮縣進世子為太子王子王女王孫爵  
命之號壹如舊儀辛卯天祿永終禪位于齊壬辰帝遜  
位于東邸既而遷居丹陽宮齊王踐阼封帝為汝陰王  
待以不臣之禮行宋正朔上書不為表答表不為詔建  
元元年五月己未徂于丹陽宮時年十三諡曰順帝六

月乙酉葬于遂寧陵

史臣曰聖王膺錄自非接亂承微則天歷不至也自三五以來受命之主莫不乘淪亡之極然後符樂推之運水德遷謝其來久矣豈止於區區汝陰揖禪而已哉



宋書卷十

宋書卷十考證

順帝紀武陵王文學劉侯入直殿省○侯一本作候



宋書卷十考證

欽定四庫全書

史部  
宋書卷十一  
二

詳校官編修<sub>臣</sub>李潢

洗馬<sub>臣</sub>王坦修覆勘

覆校官學正<sub>臣</sub>徐立綱

校對官助教<sub>臣</sub>金學詩

謄錄舉人<sub>臣</sub>徐秉敬

欽定四庫全書

宋書卷十一

梁

沈

約

撰

志第一

律志序

左史記言右史記事事則春秋是也言則尚書是也至  
於楚書鄭志晉乘楚杭之篇皆所以昭述前史俾不泯  
於後司馬遷制一家之言始區別名題至乎禮儀刑政

有所不盡乃於紀傳之外別立八書片文隻事鴻纖備舉班氏因之靡違前式網羅一代條流遂廣律歷禮樂其名不變以天官為天文改封禪為郊祀易貨殖平準之稱草河渠溝洫之名綴孫卿之辭以述刑法采孟軻之書用序食貨劉向洪範始自春秋劉歆七略儒墨異部朱贛博采風謠尤為詳洽固並因仍以為三志而禮樂疏簡所漏者多典章事數百不記一天文雖為該舉而不言天形致使三天之說紛然莫辨是故蔡邕於朔

方上書謂宜載述者也漢興接秦坑儒之後典墳殘缺  
耆生碩老常以亡逸為慮劉歆七略固之藝文蓋為此  
也河自龍門東注橫被中國每漂決所漸寄重災深堤  
築之功勞後天下且闕洛高塏地少川源是故鎬鄴潦  
潘咸入禮典漳滏鄭白之饒溝渠沾溉之利皆民命所  
祖國以為天溝洫立志亦其宜也世殊事改於今可得  
而略竊以班氏律歷前事已詳自楊偉改創景初而魏  
書闕志及元嘉重造新法大明博議回改自魏至宋宜

入今書班固禮樂郊祀馬彪祭祀禮儀蔡邕朝會董巴  
與服並各立志夫禮之所苞其用非一郊祭朝饗匪云  
別事旗章服物非禮而何今總而裁之同謂禮志刑法  
食貨前說已該隨流派別附之紀傳樂經殘缺其來已  
遠班氏所述止抄舉樂記馬彪後書又不備續至於八  
音衆器並不見書雖略見世本所闕猶衆爰及雅鄭謳  
謠之節一皆屏落曾無概見郊廟樂章每隨世改雅聲  
舊典咸有遺文又案今鼓吹鐃歌雖有章曲樂人傳習

口相師祖所務者聲不先訓以義今樂府鏡歌校漢魏  
舊曲曲名時同文字永異尋文求義無一可了不知今  
之鏡章何代曲也今志自郊廟以下凡諸樂章非淫哇  
之辭並皆詳載天文五行自馬彪以後無復記錄何書  
自黃初之始徐志肇義熙之元今以魏接漢式遵何氏  
然則自漢高帝五年之首冬暨宋順帝昇明二年之孟  
夏二辰六沴甲子無差聖帝哲王咸有瑞命之紀蓋所  
以神明寶位幽贊禎符欲使逐鹿弭謀窺覲不作握河

括地綠文赤字之書言之詳矣爰逮道至天而甘露下  
德洞地而醴泉出金芝玄秬之祥朱草白鳥之瑞斯固  
不可誣也若夫衰世德興而嘉應不息斯固天道茫昧  
難以數推亦由明主居上而震蝕之災不弭百靈咸順  
而懸象之應獨違今立符瑞志以補前史之闕地理參  
差事難談辨魏晉以來遷徙百計一郡分為四五一縣  
割成兩三或昨屬荆豫今隸司兗朝為零桂之士夕為  
廬九之民去來紛擾無暫止息版籍為之渾淆職方所



以不能記自我狄內侮有晉東遷中土遺氓播徙江外  
幽并冀雖究豫青徐之境幽淪寇逆自扶莫而裹足奉  
首免身於荆越者百郡千城流寓比室人佇鴻鴈之歌  
士蓄懷本之念莫不各樹邦邑思復舊井既而民單戶  
約不可獨建故魏邦而有韓邑齊縣而有趙民且省置  
交加日回月徙寄寓遷流迄無定託邦名邑號難或詳  
書大宋受命重啓邊隙淮北五州翦為寇境其或奔亡  
播遷復立郡縣斯則元嘉泰始同名異實今以班固馬

彪二志晉宋起居凡諸記註悉加推討隨條辨析使悉  
該詳百官置省備有前說尋源討流於事為易元嘉中  
東海何承天受詔纂宋書其志十五篇以續馬彪漢志  
其證引該博者即而因之亦由班固馬遷共為一家者  
也其有漏闕及何氏後事備加搜采隨就補綴焉淵流  
浩漫非孤學所盡足蹇途遙豈短策能運雖斟酌前史  
備覩妍媸而愛嗜異情取捨殊意每含毫握簡杼軸忘  
食終亦不足與班左並馳董南齊轡庶為後之君子削

藁而已焉

黃帝使伶倫自大夏之西阮隃之陰取竹之嶰谷生其  
竅厚均者斷兩節間而吹之以為黃鍾之宮制十二管  
以聽鳳鳴以定律呂夫聲有清濁故協以宮商形有長  
短故檢以丈尺器有大小故定以斛斗質有輕重故平  
以鈞石故虞書曰乃同律度量衡然則律呂宮商之所  
由生也夫樂有器有文有情有官鐘鼓干戚樂之器也  
屈伸舒疾樂之文也論倫無患樂之情也欣喜歡愛樂

之官也是以君子反情以和志廣樂以成教故能情深而文明氣盛而化神和順積中而英華發外故曰樂者心之動也聲者樂之象也周禮曰乃奏黃鐘歌大呂舞雲門以祀天神乃奏太簇歌應鐘舞咸池以祭地祇四望闕山川先祖各有其樂又曰圜鐘為宮黃鐘為徵姑洗為羽雷鼓雷鼗孤竹之管雲和之琴瑟雲門之舞冬日至於地上之圜丘奏之若樂六變則天神皆降可得而禮矣地祇人鬼禮亦如之其可以感物興化若此之

深也道始於一一生二二生三三而九故黃鐘之數六分而為雌雄十二鍾鐘以三成故置一而三之凡積分十七萬七千一百四十七為黃鐘之實故黃鐘位子主十一月下生林鐘林鐘之數五十四主六月上生太簇太簇之數七十二主正月下生南呂南呂之數四十八主八月上生姑洗姑洗之數六十四主三月下生應鐘應鐘之數四十三主十月上生蕤賓蕤賓之數五十七主五月上生大呂大呂之數七十六主十二月下生夷

則夷則之數五十主七月上生夾鐘夾鐘之數六十七

主二月下生無射無射之數四十五主九月上生中呂

中呂之數六十主四月極不生

極不生鐘律不能復相生

宮生徵徵

生商商生羽羽生角角生姑洗姑洗生應鐘不比於正

音故為和

姑洗三月應鐘十月不與正音比故為和從聲也

應鐘生蕤賓蕤賓

不比於正音故為繆

繆音相干也周律故有繆和為武王伐紂七音

日冬至音

比林鐘漫以濁日夏至音比黃鐘漫以清以十二月律

應二十四時甲子中呂之徵也丙子夾鐘之羽也戊子

黃鐘之宮也庚子無射之商也壬子夷則之角也古人  
為度量輕重皆生乎天道黃鐘之律長九寸物以三生  
三三九三九二十七故幅廣二尺七寸古之制也音以  
八相生故人長八尺尋自倍故八尺而為尋有形即有  
聲音之數五以五乘八五八四十尺為匹匹者中人之  
度也一匹為制秋分而禾標定標禾穗也標定而禾孰律  
之數十二故十二標而當一粟十粟而當一寸律以當  
辰音以當日日之數十故十寸而為尺十尺為丈其以

為重十二粟而當一分十二分而當一銖十二銖而當  
半兩衡有左右因而倍之故二十四銖而當一兩天有  
四時以成一歲因而四之四四十六故十六兩而一斤  
三月而一時三十日一月故三十斤而為一鈞四時而  
一歲故四鈞而一石其為音也一律而生五音十二律  
而為六十音因而六之六六三十六故三百六十音以  
當一歲之日故律歷之數天地之道也下生者倍以三  
除之上生者四以三除之楊子雲曰聲生於日

謂甲巳  
為角乙



庚為商丙辛為徵丁律生於辰謂子為黃鐘丑為大呂之屬聲以情

質

質正也各以其行本情為正也

律以和聲

當以律管鐘均和其清濁之聲

聲律相協

而八音生

協和

宮商角徵羽謂之五聲金石匏革絲竹土

木謂之八音聲和音諧是謂五樂夫陰陽和則景至律

氣應則灰除是故天子常以冬至夏至御前殿合八能之

士陳八音聽樂均度晷景候鐘律權土炭效陰陽冬至

陽氣應則樂均清景長極黃鐘通土炭輕而衡卯夏至

陰氣應則樂均濁景短極蕤賓通土炭重而衡低進退

於先後五日之中八能各以候狀聞太史令封上効則和否則占候氣之法為室三重戶閉塗釁周密布緹幔室中以木為案每律各一內庫外高從其方位加律其上以葭莩灰布其內端案歷而候之氣至者吹去散人及風所動者其灰聚殿中候用玉律十二唯二至乃候取弘農宜陽縣金門山竹為灰三代陵遲音律失度漢興北平侯張蒼始定律歷孝武之世置協律之官元帝時郎中京房知五音六十律之數受學於小黃令焦延

壽其下生上生終於中呂而十二律畢矣中呂上生執  
始執始下生去滅終於南事而六十律畢矣夫十二律  
之變至於六十猶八卦之變至於六十四也宓義作易  
紀陽氣之初以為律法建日冬至之聲以黃鐘為宮太  
族為商姑洗為角林鐘為徵南呂為羽應鐘為變宮蕤  
賓為變徵此聲氣之元五音之正也故各統一曰其餘  
以次運行當日者各自為宮而商角徵羽以類從焉禮  
運篇曰五聲六律十二管還相為宮此之謂也以六十

律分一暮之日黃鐘自冬至始及冬至而復陰陽寒煖風雨之占於是生焉房又曰竹聲不可以度調故作準以定數準之狀如瑟長丈而十三弦隱間九尺以應黃鐘之律九寸中央一弦下有畫分寸以為六十律清濁之節房言律詳其術施行於史官候部用之續漢志具載其律準度數

漢章帝元和元年待詔候鐘律殷彤上言官無曉六十律以準調音者故待詔嚴嵩具以準法教子男宣願召

宣補學官主調樂器詔曰嵩子學審曉律別其族協其聲者審試不得依託父學以聾為聰聲微妙獨非莫知獨是莫曉以律錯吹能知命十二律不失一乃為能傳嵩學耳試宣十二律其二中其四不中其六不知何律宣遂罷自此律家莫能為準靈帝熹平六年東觀召典律者太子舍人張光等問準意光等不知歸閱舊藏乃得其器形制如房書猶不能定其絃緩急音不可以書曉人知之者欲教而無從心達者體知而無師故史官

能辨清濁者遂絕其可以相傳者唯候氣而已

舊律度

新律度

舊律分

新律分

新律小分  
十三十六

黃鐘九寸

九寸

十七萬七千一十七萬七千一

百四十七 百四十七

林鐘六寸

六寸一釐

十一萬八千十一萬八千二

九十八 百九十六二十五

太簇八寸

八寸二釐

十五萬七千十五萬七千八百

四百六十四六十一十四

南呂五寸二五寸三分六十萬四千九十萬五千五

分三釐

彊少

釐

彊少

百七十六

百七十二

姑洗七寸一分七寸一分五釐

彊少

十三萬九千十四萬七百六

一釐

彊

九百六十八十二二十八

應鐘四寸七四寸七分九九萬三千三九萬四千三

分

釐

彊

百一十二

百五十七

蕤賓六寸三六寸三分八十二萬四千十二萬五千六

分二釐

彊

釐

彊少

四三十六

八六

太呂八寸四分八寸四分九十六萬五千十六萬七千二

二釐

大彊

釐

大彊

八百八十八百七十八三十一

夷則五寸六分五寸七分

弱

十一萬五百十一萬二千一

一釐

大彊

九十二

百八十一二十

夾鐘七寸四七寸五分八釐十四萬七千四十四萬九千

分九釐

少彊

百五十六

二百四十四九

無射四寸九五寸九釐半九萬八千三十萬二百九

分九釐

半彊

百四

十三十四



中呂六寸六六寸七分七釐十三萬一千七十三萬三千二

分六釐

弱

十二

百五十七二十五

黃鐘八寸八九寸

十七萬四千十七萬七千

分八釐

弱

七百六十二一百四十七

三分之二分二千四百八十四三分之一

論曰律呂相生皆三分而損益之先儒推十二律從子

至亥每三之凡十七萬七千一百四十七而三約之是

為上生故漢志云三分損一下生林鐘三分益一上生

太簇無射既上生中呂則中呂又當上生黃鐘然後五  
聲六律十二管還相為宮今上生不及黃鐘實二千三  
百八十四九約實一千九百六十八為一分此則不周  
九寸之律一分有奇豈得還為宮乎凡三分益一為上  
生三分損一為下生此其大略猶周天斗分四分之一  
耳京房不思此意比十二律微有所增方引而伸之中  
呂上生執始執始下生去減至於南事為六十律竟復  
不合彌益其疎班氏所志未能通律呂本源徒訓角為

觸徵為祉陽氣施種於黃鐘如斯之屬空煩其文而為辭費又推九六欲符劉歆三統之數假託非類以飾其說皆孟堅之妄矣

蔡邕從朔方上書云前漢志但載十律不及六十六律尺寸相生司馬彪皆已志之漢末亡失雅樂黃初中鑄工柴玉巧有意思形器之中多所造作協律都尉杜夔令玉鑄鐘其聲清濁多不如法數毀改作玉甚厭之謂夔清濁任意更相訴白於魏王魏王取玉所鑄鐘雜錯

更試然後知夔為精於是罪玉及諸子皆為養馬主晉  
泰始十年中書監荀勗中書令張華出御府銅竹律二  
十五具部太樂郎劉秀等校試其三具與杜夔及左延  
年律法同其二十二具視其銘題尺寸是笛律也問協  
律中郎將列和辭昔魏明帝時令和承受笛聲以作此  
律欲使學者別居一坊歌詠講習依此律調至於都合  
樂時但識其尺寸之名則絲竹歌詠皆得均合歌聲濁  
者用長笛長律歌聲清者用短笛短律凡絃歌調張清

濁之制不依笛尺寸名之則不可知也最等奏首先王之作樂也以振風蕩俗饗神佐賢必協律呂之和以節八音之用是故郊祀朝宴用之有制歌奏分敘清濁有宜故曰五聲十二律還相為宮此經傳記籍可得而知者也如和對辭笛之長短無所象則率意而作不由曲度考以正律皆不相應吹其聲均多不諧合又辭先師傳笛別其清濁直以長短工人裁制舊不依律是為作笛無法而和寫笛造律又令琴瑟歌詠從之為正非所

以稽古先哲垂憲於後者也謹條牒諸律問和意狀如  
左及依典制用十二律造笛像十二枚聲均調和器用  
便利講肄彈擊必合律呂況乎宴饗萬國奏之廟堂者  
哉雖伶夔曠遠至音難精猶宜形古昔以求厥衷合於  
經禮於制為詳若可施用請更部笛工選竹造作太樂  
樂府施行平議諸杜夔左延年律可皆留其御府笛正  
聲下徵各一具皆銘題作者姓名其餘無所施用還付  
御府毀奏可勗又問和作笛為可依十二律作十二笛

令一孔依一律然後乃以為樂不和辭太樂東廂長笛正聲已長四尺二寸令當復取其下徵之聲於法聲濁者笛當長計其尺寸乃五尺有餘和昔日作之不可吹也又笛諸孔雖不校試意謂不能得一孔輒應一律也案太樂四尺二寸笛正聲均應蕤賓以十二律還相為宮推法下徵之孔當應律大呂大呂笛長二尺六寸有奇不得長五尺餘令太樂郎劉秀鄧昊等依律作大呂笛以示和又吹七律一孔一校聲皆相應然後令郝生

鼓箏宋同吹笛以為雜引相和諸曲和乃辭曰自和父祖漢世以來笛家相傳不知此法而令調均與律相應實非所及也郝生魯基种整朱夏皆與和同又問和笛有六孔及其體中之空為七和為能盡名其宮商角徵不孔調與不調以何檢知和辭先師相傳吹笛但以作曲相語為某曲當舉某指初不知七孔盡應何聲也若當作笛其仰尚方笛工依案舊像訖但吹取鳴者初不復校其諸孔調與不調也案周禮調樂金石有一定之



聲是故造鐘磬者先以律調之然後施於廂懸作樂之時諸音皆受鐘磬之均即為悉應律也至於饗宴殿堂之上無廂懸鐘磬以笛有一定調故諸絃歌皆從笛為正是為笛猶鐘磬宜必合於律呂如和所對直以意造率短一寸七孔聲均不知其皆應何律調與不調無以檢正唯取竹之鳴者為無法制輒部郎劉秀鄧昊缺魏邵等與笛工參共作笛工人造其形律者定其聲然後器象有制音均和協又問和若不知律呂之義作樂

音均高下清濁之調當以何名之和辭每合樂時隨歌者聲之清濁用笛有長短假令聲濁者用三尺二笛因名曰此三尺二調也聲清者用二尺九笛因名曰此二尺九調也漢魏相傳施行皆然案周禮奏六樂乃奏黃鐘歌大呂乃奏太簇歌應鐘皆以律呂之義紀歌奏清濁而和所稱以二尺三尺為名雖漢魏用之俗而不典部郎劉秀鄧昊等以律作笛三尺一寸者應無射之律若宜用長笛執樂者曰請奏無射周語曰無射所以宣

布哲人之令德示民軌儀也二尺八寸四分四釐應黃鐘之律若宜用短笛執樂者曰請奏黃鐘周語曰黃鐘所以宣養六氣九德也是則歌奏之義當合經禮考之古典於制為雅書曰予欲聞六律五聲八音在治忽始周禮載六律六同禮記又曰五聲十二律還相為宮劉歆班固纂律歷志亦紀十二律唯京房始創六十律至章帝時其法已亡蔡邕雖追古作其言亦曰今無能為者依案古典及今音家所用六十律者無施於樂謹依

典記以五聲十二律還相為宮之法制十二笛象記注

圖側如別省圖不如視笛之孔故復重作蕤賓伏孔笛

其制云黃鐘之笛正聲應黃鐘下徵應林鐘長二尺八

寸四分四釐有奇

周語曰黃鐘所以宣養六氣九德也  
正聲調法以黃鐘為宮則姑洗為角

翕笛之聲應姑洗故以四角之長為黃  
鐘之笛也其宮聲正而不倍故曰正聲正聲調法黃鐘

為宮

第一孔

應鐘為變宮

第二孔

南呂為羽

第三孔

林鐘為徵

第四孔

蕤賓為變徵

第五附孔

姑洗為角

笛體中聲

太簇為商

笛後出孔

也商聲濁於角當在角下而角聲以在體中故上其商  
孔令在宮上清於宮也然則宮商正也餘聲皆倍也是

故從宮以下孔轉下轉濁也此章說笛孔上正聲調法

黃鐘為宮

作黃鐘之笛將求宮孔以姑洗及黃鐘律從笛首下度之盡二律之長而為孔則得宮聲

也宮生徵黃鐘生林鐘也

以林鐘之律從宮孔下度之盡律作孔則得徵聲也徵

生商林鐘生太簇也

以太簇律從林鐘孔上度之盡律以為孔則得商聲也商生羽

太簇生南呂也

以南呂律從商孔下度之盡律為孔則得羽聲也羽生角南呂

生姑洗也

以姑洗律從羽孔上行度之盡律而為孔則得角聲也然則出於商孔之上吹笛者左手

所不及也從羽孔下行度之盡律而為孔亦得角聲出於附商孔之下則吹者右手所不逮也故不作角孔推而下之復倍其均是以角聲在笛體中古之制也音家舊法雖一倍再倍但令均同適足為唱和之聲無害於

曲均故也周語曰匏竹利制角生變宮姑洗生應鍾也

議宜謂便於事用從宜者也上句所謂當為角孔而出商下者墨點識之以應律也從此點下行度之為孔則得變宮之聲也變宮

生變徵應鍾生蕤賓也

以蕤賓律從變宮下度之盡律為孔則得變徵之聲十二笛之

制各以其宮為主相生之法或下徵調法林鍾為宮第

倍或半其使事用例皆一者也孔也本正聲黃鍾之徵徵清當在宮上用笛之宜倍令濁下故曰下徵下徵更為宮者記所謂五聲十二律還

相為宮者然則正聲南呂為商第三孔本正聲黃鍾應調清下徵調濁也之羽今為下徵之商

鐘為角

第二孔也本正聲黃鍾之黃鍾為變徵下徵之調林鍾

為宮大呂當變徵而黃鍾笛本無大呂之聲故假用黃鍾以為變徵也假用之法當變徵之聲則俱發黃鍾及

太簇應鍾三孔黃鐘應濁而太簇清大呂律在二律之間俱發三孔而徵磴護之則得大呂變徵之聲矣諸笛下徵調求變徵之法皆如此

太簇為徵

笛後出孔本正聲之徵

姑洗為

羽

笛體中翕聲也本正聲之角今為下徵之羽也

蕤賓為變宮

附孔是也本正聲之變徵也今

為下徵之變宮也然則正聲之調孔轉下轉濁下徵之調孔轉上轉清也

清角之調以姑洗

為宮

即是笛體中翕聲也於正聲為角於下徵為羽清角之調乃以為宮而哨吹令清故曰清角唯得為

宛詩謠俗之曲不合雅樂也

蕤賓為商

正也林鐘為角

非正也

南呂為變

徵

非正也

應鍾為徵

正也

黃鐘為羽

非正也

太簇為變宮

非正也清

角之調唯宮商及徵與律相應餘四聲非正者皆濁一律哨吹令清假而用之其例一也

凡笛體用

角律其長者八之

鍾也 蕤賓林

短者四之

其餘十笛皆四角也

空中實

容長者十六

短笛竹宜受八律之黍也若長短大小不合於此或器用不便聲均法度之齊等也

然笛竹率上天下小不能均齊必不得已取其聲均合

三宮

一曰正聲二曰下徵三曰清角二十

一變也

宮有七聲錯綜用之故二

伏孔四所以便事用

也

一曰正角出於商上者也二曰倍角近笛下者也三曰變宮近於宮孔倍令下者也四曰變徵遠於徵孔

倍令高者也或倍或半或四分一取則於琴徵也四者皆不作其孔而取其度以應進退上下之法所以協聲

均便事用也其本孔隱而不見故曰伏孔

大呂之笛正聲應大呂下徵應夷則長二尺六寸六分



三鼗有奇

周語曰元間大呂助宣物也

太簇之笛正聲應太簇下徵應南呂長二尺五寸三分

一鼗有奇

周語曰太簇所以金奏贊陽出滯也

夾鐘之笛正聲應夾鐘下徵應無射長二尺四寸

周語曰二

間夾鐘出四隙之細也

姑洗之笛正聲應姑洗下徵應應鐘長二尺二寸三分

三鼗有奇

周語曰三間中呂宣中氣也

蕤賓之笛正聲應蕤賓下徵應大呂長三尺九寸九分

五鼗有奇

周語曰鼗賓所以安靜神人獻酬交酢變宮近孔故陪半令下便於用也林鐘亦如之

林鐘之笛正聲應林鐘下徵應太簇長三尺七寸九分

七鼗有奇

周語曰四間林鐘和展百事俾莫不任肅純恪

夷則之笛正聲應夷則下徵應夾鐘長三尺六寸

周語曰夷

則所以詠歌九州平民無貳也變宮之法亦如鼗賓體用四角故四分益一也

南呂之笛正聲應南呂下徵應姑洗長三尺三寸七分

周語曰五間南呂贊陽秀也

無射之笛正聲應無射下徵應中呂長三尺二寸

周語曰無

射所以宣布哲人之  
令德示民軌儀也

應鐘之笛正聲應應鐘下徵應蕤賓長五尺九寸九分

六釐有奇

周語曰六間應鐘均  
利器用俾應復也

勗又以魏杜夔所制律呂檢校太樂總章鼓吹八音與  
律乖錯始知後漢至魏尺度漸長於古四分有餘夔依  
為律呂故致失韻及部佐著作郎劉恭依周禮更積黍  
起度以鑄新律既成慕求古器得周時玉律比之不差  
毫釐又漢世故鐘以律命之不叩而自應初勗行道逢

趙郡商人縣鐸於牛其聲甚韻至是搜得此鐸以調律  
呂焉

晉武帝以勗律與周漢器合乃施用之散騎侍郎阮咸  
譏其聲高非興國之音咸亡後掘地得古銅尺果長勗  
尺四分時人咸服其妙

元康中裴頠以為醫方民命之急而稱兩不與古同為  
害特重宜因此改治權衡不見省

黃鐘箱笛晉時三尺八寸元嘉九年太樂令鍾宗之減

為三尺七寸十四年治書令史奚縱又減五分為三尺

六寸五分

列和云東箱長  
笛四尺二寸也

太簇箱笛晉時三尺七寸宗

之減為三尺三寸七分縱又減一寸一分為三尺二寸  
六分姑洗箱笛晉時三尺五寸宗之減為二尺九寸七  
分縱又減五分為二尺九寸二分蕤賓箱笛晉時二尺  
九寸宗之減為二尺六寸縱又減二分為二尺五寸八  
分

宋書卷十一

宋書卷十一考證

律志序版籍為之渾淆職方所以不能記○以字疑衍  
黃帝使伶倫自大夏之西阮隃之陰○漢書作昆侖之  
陰

猶宜形古昔以求厥衷○形當作型

宋書卷十一考證



欽定四庫全書

宋書卷十二

梁

沈

約

撰

志第二

歷上

夫天地之所貴者生也萬物之所尊者人也役智窮神  
無幽不察是以動作云為皆應天地之象古先聖哲擬  
辰極制渾儀夫陰陽二氣陶育羣品精象所寄是為日

月羣生之性章為五才五才之靈五星是也歷所以擬  
天行而序七耀紀萬國而授人時黃帝使大撓造六甲  
容成制歷象義和占日常儀占月少昊氏有鳳鳥之瑞  
以鳥名官而鳳鳥氏司歷顓頊之代南正重司天北正  
黎司地堯復育重黎之後使治舊職分命羲和欽若昊  
天故虞書曰朞三百有六旬六日以閏月定四時成歲  
其後授舜曰天之歷數在爾躬舜亦以命禹爰及殷周  
二代皆勑業草制而服色從之順其時氣以應天道萬

物羣生蒙其利澤三王既謝史職廢官故孔子正春秋以明司歷之過秦兼天下自以為水德以十月為正服色上黑漢興襲秦正朔北平侯張蒼首言律歷之事以顓頊歷比於六歷所失差近施用至武帝元封七年太中大夫公孫卿壺遂太史令司馬遷等言歷紀廢壞宜改正朔易服色所以明受之於天也乃詔遂等造漢歷選鄧平長樂司馬可及人間治歷者二十餘人方士唐都分天部洛下閎運算轉歷其法積八十一寸則一日

之分也閏與鄧平所治同於是皆觀星度日月行更以算推如閏平法一月之日二十九日八十一分日之四十三詔遷用鄧平所造八十一分律歷以平為太史丞至元鳳三年太史令張壽王上書以為元年用黃帝調歷令陰陽不調更歷之過詔下主歷使者鮮于妄人與治歷大司農中丞麻光等二十餘人雜候晦朔弦望二十四氣又詔丞相御史大將軍右將軍史各一人雜候上林清臺課諸䟽密凡十一家起三年盡五年壽王課

疏遠又漢元年不用黃帝調歷效劾壽王逆天地大不敬詔勿劾復候盡六年太初歷第一壽王歷乃太史官殷歷也壽王再劾不服竟下吏至孝成時劉向總六歷列是非作五紀論向子歆作三統歷以說春秋屬辭比事雖盡精巧非其實也班固謂之密要故漢歷志述之校之何承天等六家之歷雖六元不同分章或異至今所差或三日或二日數時考其遠近率皆六國及秦時人所造其術斗分多上不可檢於春秋下不驗於漢魏

雖復假稱帝王祇足以惑時人耳

光武建武八年太僕朱浮上言歷紀不正宜當改治時所差尚微未遑考正明帝永平中侍詔楊岑張盛景防等典治歷但改易加時弦望未能綜校歷元也至元和二年太初失天益遠宿度相覺浸多候者皆知日宿差五度冬至之日在斗二十一度晦朔弦望先天一日章帝召治歷編訢李梵等綜核意狀遂下詔書稱春秋保乾圖曰三百年斗歷改憲史官用太初鄧平術有餘分

一在三百年之域行度轉差浸以繆錯璇璣不正文象  
不稽冬至之日日在斗二十二度先立春一日則四分  
之立春日也而以折獄斷大刑於氣已逆用望平和盖  
亦遠矣今改行四分以遵堯順孔奉天之文同心敬授  
儻獲咸熙於是四分法施行黃帝以來諸歷以為冬至  
在牽牛初者皆黜焉和帝永元十四年待詔太史霍融  
上言官漏刺率九日增減一刻不與天相應或時差至  
二刻半不如夏歷密其年十一月甲寅詔曰漏所以節

時分定昏明昏明長短起於日去極遠近日道周圍不可以計率分官漏九日增減一刻違失其實以晷景為刻密近有驗今下晷景漏刻四十八箭其二十四氣日所在并黃道去極晷景漏刻昏明中星並列載於續漢律歷志安帝延光二年中謁者亶誦上書言當用甲寅元河南梁豐云當復用太初尚書郎張衡周興皆審歷數難誦豐或不能對或云失誤衡等參案儀注考往校今以為九道法最密詔下公卿詳議太尉愷等參議太



初過天一度月以晦見西方元和改從四分四分雖密  
於太初復不正皆不可用甲寅元與天相應合圖讖可  
施行議者不同尚書令忠上奏天之歷數不可任疑從  
虛以非易是亶等遂寢靈帝熹平四年五官郎中馮光  
沛相上計掾陳晃等言歷元不正故盜賊為害歷當以  
甲寅為元不用庚申乞本庚申元經緯明文詔下三府  
與儒林明道術者詳議羣臣會司徒府集議議郎蔡邕  
曰歷數精微術無常是漢興承秦歷用顓頊元用乙卯

百有二歲孝武皇帝始改太初元用丁丑行之百八十  
九歲孝章帝改從四分元用庚申今光等以庚申為非  
甲寅為是按歷法黃帝顓頊夏殷周魯各自有元光晃  
所援則殷歷元也昔始用太初丁丑之後六家紛錯爭  
訟是非張壽王挾甲寅元以非漢歷雜候清臺課在下  
第太初效驗無所漏失是則雖非圖讖之元而有效於  
前者也及用四分以來考之行度密於太初是又新元  
有效於今者也故延光中亶誦亦非四分言當用甲寅

元公卿參議竟不施行且三光之行遲速進退不必若  
一故有古今之術今術之不能上通於古亦猶古術不  
能下通於今也又光晃以考靈耀為本二十八宿度數  
至日所在錯異不可參校元和二年用至今九十二歲  
而光晃言陰陽不和姦臣盜賊皆元之咎元和詔書文  
備義著非羣臣議者所能變易三公從邕議以光晃不  
敬正鬼神法詔書勿治臯

何承天曰夫歷數之術若心所不達雖復通人前識無

救其為敝也是以多歷年歲未能有定四分於天出三百年而盈一日積代不悟徒云建歷之本必先立元假言讖緯遂闢治亂此之為蔽亦已甚矣劉歆三統法尤復疏闊方於四分六千餘年又益一日揚雄心惑其說采為太玄班固謂之最密著於漢志司馬彪因曰自太初元年始用三統歷施行百有餘年曾不憶劉歆之生不逮太初二三君子言歷幾乎不知而妄言歟

光和中穀城門候劉洪始悟四分於天疏闊更以五百

八十九為紀法百四十五為斗分造乾象法又制遲疾  
歷以步月行方於太初四分轉精微矣魏文帝黃初中  
太史丞韓翊以為乾象減斗分太過後當先天造黃初  
歷以四千八百八十三為紀法一千二百五為斗分其  
後尚書令陳羣奏以為歷數難明前代通儒多共紛爭  
黃初之元以四分歷久遠疏闊大魏受命宜正歷明時  
韓翊首建黃初猶恐不審故以乾象互相參校歷三年  
更相是非舍本即末爭長短而疑尺丈竟無時而決按

三公議皆綜畫曲理殊塗同歸欲使效之璿璣各盡其法一年之間得失定合於事宜奏可明帝時尚書郎楊偉制景初歷施用至於晉宋古之為歷者鄧平能修舊制新劉洪始減四分又定月行遲疾楊偉斟酌兩端以立多少之衷因朔積分設差以推合朔月蝕此三人漢魏之善歷者然而洪之遲疾不可以檢春秋偉之五星大乖於後代斯則洪用心尚疏偉拘於同出上元壬辰故也

魏明帝景初元年改定歷數以建丑之月為正改其年三月為孟夏四月其孟仲季月雖與正歲不同至於郊祀迎氣祭祠烝嘗巡狩蒐田分至啓閉班宣時令皆以建寅為正三年正月帝崩復用夏正楊偉表曰臣攬載籍斷考歷數時以紀農月以紀事其所由來遐而尚矣乃自少昊則玄鳥司分顓頊帝嚳則重黎司天唐帝虞舜則義和掌日三代因之則世有日官日官司歷則頒之諸侯諸侯受之則頒於境內夏后之代義和湏淫廢

時亂日則書載脩征由此觀之審農時而重人事者歷代然也逮至周室既衰戰國橫騖告朔之羊廢而不紹登臺之禮滅而不遵閏分乖次而不識孟陬失紀而莫悟大火猶西流而怪蜚蟲之不藏也是時也天子不協時司歷不書日諸侯不受職日御不分朔人事不恤廢棄農時仲尼之撥亂於春秋託褒貶紂正司歷失閏則譏而書之登臺頒朔則謂之有禮自此以降暨於秦漢乃復以孟冬為歲首閏為後九月中節乖錯時月紕繆



加時後天蝕不在朔累載相襲久而不革也至武帝元封七年始乃寤其繆焉於是改正朔更歷數使大才通人造太初歷校中朔所差以正閏分課中星得度以考疏密以建寅之月為正朔以黃鐘之月為歷初其歷斗分太多後遂疏闊至元和二年復用四分歷施而行之至於今日考察日蝕率常在晦是則斗分太多故先密後疏而不可用也是以臣前以制典餘日推考天路稽之前典驗之食朔詳而精之更建密歷則不先不後古今

中天以昔在唐帝協日正時允釐百工咸熙庶績也欲使當今國之典禮凡百制度皆韜合往古郁然備足乃改正朔更歷數以大呂之月為歲首以建子之月為歷初臣以為昔在帝代則法曰顓頊曩自軒轅則歷曰黃帝暨至漢之孝武草正朔更歷數改元曰太初因名太初歷今改元為景初宜曰景初歷臣之所建景初歷法數則約要施用則近密治之則省功學之則易知雖復使研桑心筭隸首運籌重黎司晷義和察景以考天路

步驗日月究極精微盡術數之極者皆未如臣如此之妙也是以累代歷數皆疏而不密自黃帝以來改草不已

壬辰元以來至景初元年丁巳歲積四千四十六筭上此元以天正建子黃鍾之月為歷初元首之歲夜半甲子朔旦冬至

元法萬一千五十八

紀法千八百四十三

紀月二萬二千七百九十五

章歲十九

章月二百三十五

章閏七

通數十三萬四千六百三十

日法四千五百五十九

餘數九千六百七十

周天六十七萬三千一百五十

紀日歲中十二

氣法十二

沒分六萬七千二百一十五

沒法九百六十七

月周二萬四千六百三十八

通法四十七

會通七十九萬一百二十

朔望合數六萬七千三百一十五

入交限數七十二萬二千七百九十五

通周十二萬五千六百二十一

周日日餘二千五百二十八

周虛二千三十一

斗分四百五十五

甲子紀第一

紀首合朔月在日道裏

交會差率四十一萬二千九百一十九

遲疾差率十萬三千九百四十七

甲戌紀第二

紀首合朔月在日道裏

交會差率五十一萬六千五百二十九

遲疾差率七萬三千七百六十七

甲申紀第三

紀首合朔月在日道裏

交會差率六十二萬一百三十九

遲疾差率四萬三千五百八十七

甲午紀第四

紀首合朔月在日道裏

交會差率七十二萬三千七百四十九

遲疾差率一萬三千四百七

甲辰紀第五

紀首合朔月在日道裏

交會差率三萬七千二百四十九



遲疾差率一十萬八千八百四十八

甲寅紀第六

紀首合朔月在日道裏

交會差率十四萬八百五十九

遲疾差率七萬八千六百六十八

交會紀差十萬三千六百一十求其數之所生者置一  
紀積月以通數乘之會通去之所去之餘紀差之數也  
以之轉加前紀則得後紀加之未滿會通者則紀首之

金史卷之八十二  
歲天正合朔月在日道裏滿去之則月在日道表加表  
滿在裏加裏滿在表

遲疾紀差三萬一百八十求其數之所生者置一紀積  
月以通數乘之通周去之餘以減通周所減之餘紀差  
之數也以之轉減前紀則得後紀不足減者加通周  
求次元紀差率轉減前元甲寅紀差率餘則次元甲子  
紀差率也求次紀如上法也

推朔積月術曰置壬辰元以來盡所求年外所求以紀

法除之所得算外所入紀第也餘則入紀年數年以章月乘之如章歲而一為積月不盡為閏餘閏餘十二以上其年有閏閏月以無中氣為正

推朔術曰以通數乘積月為朔積分如日法而一為積日不盡為小餘以六十去積日餘為大餘大餘命以紀算外所求年天正十一月朔日也

求次月加大餘二十九小餘二千四百一十九小餘滿日法從大餘命如前次月朔日也小餘二千一百四十

以上其月大也

推弦望加朔大餘七小餘千七百四十四小分一小分  
滿二從小餘小餘滿日法從大餘大餘滿六十去之餘  
命以紀筭外上弦日也又加得望下弦後月朔其月蝕  
望者定小餘如所近中節間限限數以下者筭上為日  
望在中節前後各四日以還者視限數望在中節前後  
各五日以上者視間限

推二十四氣術曰置所入紀年外所求以餘數乘之滿

紀法為大餘不盡為小餘大餘滿六十去之餘命以紀  
筭外天正十一月冬至日也

求次氣加大餘十五小餘四百二小分十一小分滿氣  
法從小餘滿紀法從大餘命如前次氣日也

推閏月術曰以閏餘減章歲餘以歲中乘之滿章閏得  
一月餘滿半法以上亦得一月數從天正十一月起筭  
外閏月也閏有進退以無中氣御之

大雪十一月節

限數千二百四十二  
間限千二百四十八

冬至十一月中

間限數千二百五十四  
限數千二百四十五

小寒十二月節

間限數千二百三十五  
限數千二百二十四

大寒十二月中

間限數千二百一十三  
限數千一百九十二

立春正月節

間限數千一百七十二  
限數千一百三十七

雨水正月中

間限數千一百一十二  
限數千九十三

驚蟄二月節

間限數千六十五  
限數千二十五

春分二月中

間限數千八十九  
限數九百七十九

清明三月節

間限數九百五十一  
限數九百二十五

穀雨三月中

間限數九百  
限數八百七十九

立夏四月份

間限數八百五十七  
限數八百四十七

小滿四月中

間限數八百三十三  
限數八百一十三

芒種五月份

間限數八百十九  
限數七百九十九

夏至五月中

間限數七百九十八  
限數七百九十八

小暑六月份

間限數八百五十五  
限數八百一十五

大暑六月中

間限數八百二十五  
限數八百四十二

立秋七月份

間限數八百三十九  
限數八百一十三

處暑七月中

限數九百七  
間限九百三十五

白露八月節

限數九百六十二  
間限九百九十二

秋分八月中

限數千二十一  
間限千五十一

寒露九月節

限數千八十  
間限千一百七

霜降九月中

限數千一百三十三  
間限一百五十七

立冬十月節

限數千一百八十八  
間限千一百九十八

小雪十月中

限數千二百一十五  
間限千二百二十九

推沒滅術曰因冬至積日有小餘者加積一以沒分乘



之以沒法除之所得為大餘不盡為小餘大餘滿六十去之餘命以紀筭外即去年冬至後沒日也

求次沒加大餘六十九小餘五百九十二小餘滿沒法得一從大餘命如前小餘盡為減也

推五行用事日立春立夏立秋立冬者即木火金水始用事日也各減其大餘十八小餘四百八十三小分六餘命以紀筭外各四立之前土用事日也大餘不足減者加六十小餘不足減者減大餘一加紀法小分不足

減者減小餘一加氣法 推卦用事日因冬至大餘六  
其小餘坎卦用事日也加小餘萬九十一滿元法從大  
餘即中孚用事日也

求次卦各加大餘六小餘九百六十七其四正各因其  
中日六其小餘

推日度術曰以紀法乘朔積日滿周天去之餘以紀法  
除之所得為度不盡為分命度從牛前五起宿次除之  
不滿宿則天正十一月朔夜半日所在度及分也

求次日日加一度分不加經斗除斗分少退一度

推月度術曰以月周乘朔積日滿周天去之餘以紀法除之所得為度不盡為分命如上法則天正十一月朔夜半月所在度及分也

求次月小月加度二十二分八百六大月又加一日度十三分六百七十九分滿紀法得一度則次月朔夜半月所在度及分也其冬下旬夕在張心暑也

推合朔度術曰以章歲乘朔小餘滿通法為大分不盡

為小分以大分從朔夜半日度分滿紀法從度命如前則天正十一月合朔日月所共合度也

求次月加度二十九大分九百七十七小分四十二小分滿通法從大分大分滿紀法從度經斗除其分則次月合朔日月所共合度也

推弦望日所在度加合朔度七大分七百五小分十微分一微分滿二從小分小分滿通法從大分大分滿紀法從度命如前則上弦日所在度也又加得望下弦後

月合也

推弦望月所在度加合朔度九十八大分千二百七十九小分三十四數滿命如前即上弦月所在度也又加得望下弦後月合也

推日月昏明度術曰日以紀法月以月周乘所近節氣夜漏二百而一為明分日以減紀法月以減月周餘為昏分各以加夜半如法為度

推合朔交會月蝕術曰置所入紀朔積分以所入紀交

會差率之數加之以會通去之餘則所求年天正十一月合朔去交度分也以通數加之滿會通去之餘則次月合朔去交度分也以朔望合數各加其月合朔去交度分滿會通去之餘則各其月望去交度分也朔望去交分加朔望合數以下入交限數以上者朔則交會望則月蝕

推合朔交會月蝕月在日道表裏術曰置所入紀朔積分以所入紀下交會差率之數加之倍會通去之餘不

滿會通者紀首表天正合朔月在表紀首裏天正合朔月在裏滿會通去之表在裏裏在表

求次月以通數加之滿會通去之加裏滿在表加表滿在裏先交會後月蝕者朔在表則望在表朔在裏則望在裏先月蝕後交會者看食月朔在裏則望在表朔在表則望在裏交會月蝕如朔望會數以下則前交後會如入交限數以上則前會後交其前交後會近於限數者則豫伺之前月前會後交近於限數者則後伺之後

月闕求去交度術曰其前交後會者今去交度分如日法而一所得則却去交度也其前會後交者以去交度分減會通餘如日法而一所得則前去交度餘皆度分也去交度十五以上雖交不蝕也十以下是蝕十以上虧蝕微少光晷相及而已虧之多少以十五為法

求日蝕虧起角術曰其月在外道先交後會者虧蝕西南角起先會後交者虧蝕東南角起其月在內道先交後會者虧食西北角起先會後交者虧食東北角起虧



食分多少如上以十五為法會交中者蝕盡月蝕在日之衝虧角與上反也

月行遲疾度 損益率 盈縮積分 月行分

一日 十四度 分十四 益二十六 盈一初

二百八十

二日 十四度 分十一 益二十三 盈積分一十一

萬八千五百三十四

二百七十七

三日

十四度

分八

益二十

盈積分二十二

萬三千三百九十一

二百七十四

四日

十四度

分五

益十七

盈積分三十一

萬四千五百七十一

二百七十

五日

十四度

分一

益十三

盈積分三十九

萬二千七十四

二百六十七

六日

十三度

分十四

益七

盈積分四十五

萬一千三百四十一

二百六十一

七日

十三度

分七

損

盈積分四十八

萬三千二百五十四

二百五十四

八日

十三度

分一

損六

盈積分四十八

萬三千二百五十四

二百四十八

九日

十二度

十六分

損十

盈積分四十五

萬五千九百

二百四十四

十日

十二度

十三分

損十三

盈積分四十一

萬三百一十

二百四十一

十一日 十二度十一分 損十五 盈積分三十五

萬一千四十三

二百三十九

十二日 十二度八分 損十八 盈積分二十八

萬二千六百五十八

二百三十六

十三日 十二度五分 損二十一 盈積分二十萬

五百九十六

二百三十三

十四日 十二度

分三

損二十三

盈積分十萬四

千八百五十七

二百三十一

十五日 十二度

分五

益二十一

縮初

二百三十三

十六日 十二度

分七

益十九

縮積分九萬五

千七百三十九

二百三十五

十七日

十二度

分九

益十七

縮積分十八萬

二千三百六十

二百三十七

十八日

十二度

分十二

益十四

縮積分二十五

萬九千八百六十三

二百四十

十九日

十二度

分十五

益十一

縮積分三十二

萬三千六百八十九

二百四十三

二十日

十二度

十八分

益八

縮積分三十七

萬三千八百三十八

二百四十六

二十一日

十三度

三分

益四

縮積分四十一

萬三百一十

二百五十



二十二日 十三度

分七

損

縮積分四十二

萬八千五百四十六

二百五十四

二十三日 十三度

分十二

損五

縮積分四十二

萬八千五百四十六

二百五十九

二十四日 十三度

分十八

損十一

縮積分四十萬

五千七百五十一

二百六十五

二十五日

十四度

分五

損十七

縮積分三十五

萬五千六百二

二百七十一

二十六日

十四度

分十一

損二十三

縮積分二十七

萬八千六十九

二百七十七

二十七日

十四度

分十一

損二十四

縮積分十七萬

三千二百四十二

二百七十八

周日 十四度

十三分有六分  
六百二十六

損五十五

有六分  
六百二十六

縮積分六萬三千八百二十六

二百七十九

有六分  
六百二十六

推合朔交會月蝕入遲疾歷術曰置所入紀朔積分以所入紀下遲疾差率之數加之以通周去之餘滿日法得一日不盡為日餘命日算外則所求年天正十一月

合朔入歷日也

求次月加一日餘四千四百五十求望加十四日日餘  
三千四百八十九日餘滿日法成日日滿二十七去之  
又除餘如周日餘日餘不足除者減一日加周虛

推合朔交會月蝕定大小餘以入歷日乘所入歷損益  
率以損益盈縮積分為定積分以章歲減所入歷月行  
分餘以除之所得以盈減縮加本小餘加之滿日法者  
交會加時在後日減之不足者交會加時在前日月蝕

者隨定大小餘為日加時入歷在周日者以周日日餘乘縮積分為定積分以率損乘入歷日餘又以周日日餘乘之以周日日度小分并之以損定積分餘為後定積分以章歲減周日月行分餘以周日日餘乘之以周日度小分并之以除後定積分所得以加本小餘如上法

推加時以十二乘定小餘滿日法得一辰數從子起算外則朔望加時所在辰也有餘不盡者四之如日法而

一為少二為半三為太又有餘者三之如日法而一為強半法以上排成之不滿半法廢棄之以強并少為少強并半為半強并太為太強得二強者為少弱以之并少為半弱以之并半為太弱以之并太為一辰弱以所  
在辰命之則各得其少太半及強弱也其月蝕望在中節前後四日以還者視限數五日以上者視間限定小餘如間限限數以下者以算上為日

斗二十六

分四百五十五

牛八

女十二

虛十

危十七

室十六

壁九

北方九十八度

分四百五十五

奎十六

婁十二

胃十四

昂十一

畢十六

觜二

參九

西方八十度

井三十三



鬼四

柳十五

星七

張十八

翼十八

軫十七

南方百一十二度

角十二

亢九

氐十五

房五

心五

尾十八

箕十一

東方七十五度

中節日所在度

日行黃道去極度

日中晷景

晝漏刻

夜漏刻

昏中星

明中星

冬至

十一月  
中斗  
二十一少

百一十五度

丈三尺

四十五

五十五

奎六

弱

亢二

強少

小寒

十二月節  
女二少

百一十三

強

丈二尺三寸

四十五

分八

五十四

分二

婁五

強半

氏七

強

大寒

十二月  
中  
虛女半強

百一十

太弱

丈一尺

四十六

分八

五十三

分二

胃十一

太強

心半

立春

正月節危  
十太弱

百六

少弱

九尺六寸

四十八

分六

五十一

分四

畢五

弱少

尾七

弱半

雨水

正月中室  
八太強

百一

強

七尺九寸

分五

五十

分八

四十九

分二

參六

弱半

箕

弱半

驚蟄

二月節  
壁八強

九十五

強

六尺五寸

五十三

分三

四十六

分七

井十七

弱少

斗初

少



春分

二月  
中奎  
十四  
少強

八十九

強少

五尺二寸

分五

五十五

分八

四十四

分二

鬼四

斗十一

弱

清明

三月  
節胃  
一半

八十三

少弱

四尺一寸

五分

五十八

三分

四十一

七分

星四

太

斗二十一

半

穀雨

三月  
中  
二  
太

七十七

太強

三尺二寸

六十

分五

三十九

分五

張十七

牛六

半

立夏

四月節  
畢六太

七十三

少弱

二尺五寸

分二

六十二

分四

三十七

分六

翼十七

太

女十

少弱

小滿

四月  
中參  
少弱

六十九

太

尺九寸

分八

六十三

分九

三十六分一

角太弱

危太弱

芒種五月節井  
十半弱

六十七  
少弱

尺六寸  
八分

六十四  
九分

三十五  
一分

亢五

太

危十四

強

夏至

五月中井二  
十五半強

六十七

強

尺五寸

六十五

三十五

氏十二

少弱

室十二

強

小暑

六月節柳  
二太強

六十七

太強

尺七寸

六十四

七分

三十五

三分

尾一

太強

奎二

太強

大暑

六月  
中  
星四  
強

七十

二尺

六十三

分八

三十六

分二

尾十五

強半

婁三

太

立秋

七月  
節  
張  
十二  
少



七十三

強半

二尺五寸

分五

六十二

分三

三十七

分七

箕九

太強

胃九

太弱

處暑

七月中  
翼九半

七十八

強半

三尺三寸

分三

六十二

分二

三十九

分八

斗十

少

畢三

太

白露

八月節  
軫六太

八十四

少強

四尺三寸

分五

五十七  
分八

四十二  
分二

斗二十一  
強

參五  
強少

秋分  
角五弱  
八月中

九十  
強半

五尺五寸  
分二

五十五  
分二

四十四

分八

牛五

少

井十六

強少

寒露

九月節亢  
八半弱

九十六

強太

六尺八寸

分五

五十二

分六

四十七

分四

女七太

鬼三  
強少

霜降  
九月申氏  
十四少強

百二  
強少

八尺四寸

五十  
分三

四十九  
分七

虛六太

星三太

立冬

十月節尾  
四半強

百七

強少

丈八寸

分三

四十八

分二

五十一

分八

危八

強

張十五

強太

小雪

十月  
中箕  
一太強

百一十一

弱

丈一尺四寸

四十六

七分

五十三

三分

室三

半強

翼十五

太

大雪

十一月  
節斗六

百一十三

太強

丈二尺五寸

六分

四十五

三分

五十四

五分

壁

半強

軫十五

少強

右中節二十四氣如術求之得冬至十一月中也加之  
得次月節加節得其月中中星以日所在為正置所求



年二十四氣小餘四之如法得一為少不盡少三之如法為強所以減其節氣昏明中星各定

推五星術

五星者木曰歲星火曰熒惑土曰填星金曰太白水曰辰星凡五星之行有遲有疾有留有逆曩自開闢清濁始分則日月五星聚於星紀發自星紀竝而行天遲疾留逆互相逮及星與日會同宿共度則謂之合從合至合之日則謂之終各以一終之日與一歲之日通分相

約終而率之歲數歲則謂之合終歲數歲終則謂之合  
終合數二率既定則法數生焉以章歲乘合數為合月  
法以紀法乘合數為日度法以章月乘歲數為合月分  
如合月法為合月數合月之餘為月餘以通數乘合月  
數如日法而一為大餘以六十去大餘餘為星合朔大  
餘之餘為朔小餘以通數乘月餘以合月法乘朔小餘  
并之以日法乘合月法除之所得星合八月日數也餘  
以朔通法約之為八月日以朔小餘減日法餘為朔虛

分以歷斗分乘合數為星度斗分木火土各以合數減  
歲數餘以周天乘之如日度法而一所得則行星度數  
也餘則度餘金水以周天乘歲數如日度法而一所得  
則行星度數也餘則度餘

木合終歲數千二百五十五

合終合數千一百四十九

合月法二萬一千八百三十一

日度法二百一十一萬七千六百七

合月數十三

月餘萬一千一百二十二

朔大餘二十三

朔小餘四千九十三

八月日十五

日餘百九十九萬五千六百六十四

朔虛分四百六十六

斗分五十二萬二千七百九十五

行星度三十三

度餘百四十七萬二千八百

火合終歲數五千一百五

合終合數二千三百八十八

合月法四萬五千三百七十二

日度法四百四十萬一千八十四

合月數二十六

月餘二萬三

朔大餘四十七

朔小餘三千六百二十七

八月日十三

日餘三百五十八萬五千二百三十

朔虛分九百三十二

斗分百八萬六千五百四十

行星度五十

度餘百四十一萬二千一百五十

土合終歲數三千九百四十三

合終合數三千八百九

合月法七萬二千三百七十一

日度法七百一萬九千九百八十七

合月數十二

月餘五萬八千一百五十三

朔大餘五十四

朔小餘千六百七十四

八月日二十四

日餘六十七萬五千三百六十四

朔虛分二千八百八十五

斗分百七十三萬三千九十五

行星度十二

度餘五百九十六萬二千二百五十六

金合終歲數千九百七

合終合數二千三百八十五



合月法四萬五千三百一十五

日度法四百三十九萬五千五百五十五

合月數九

月餘四萬三百一十

朔大餘二十五

朔小餘三千五百三十五

入月日二十七

日餘十九萬四千九百九十

朔虛分千二十四

斗分百八萬五千一百七十五

行星度二百九十二

度餘十九萬四千九百九十

水合終歲數一千八百七十

合終合數萬一千七百八十九

合月法二十二萬三千九百九十一

日度法二千一百七十二萬七千一百二十七

合月數一

月餘二十一萬五千四百五十九

朔大餘二十九

朔小餘二千四百一十九

入月日二十八

日餘二千三十四萬千二百六十一

朔虛分二千一百四十

斗分五百三十六萬三千九百九十五

行星度五十七

度餘二千三十四萬四千二百六十一

推五星術曰置壬辰元以來盡所求年以合終合數乘之滿合終歲數得一名積合不盡名合餘以合終合數減合餘得一者星合往年得二者合前往年無所得合其年餘以減合終合數為度分金水積合偶為晨奇為夕

推五星合月以月數月餘各乘積合餘滿合月法從月

為積月不盡為月餘以紀月除積月所得筭外所入紀也餘為入紀月副以章閏乘之滿章月得一為閏以減入紀月餘以歲中去之餘為入歲月命以天正起筭外星合月也其在閏交際以朔御之

推合月朔以通數乘入紀月滿日法得一為積日不盡為小餘以六十去積日餘為大餘命以所入紀筭外星合朔日也

推八月日以通數乘月餘合月法乘朔小餘并之通法

約之所得滿日度法得一則星合八月日也不滿為日  
餘命日以朔算外八月日也

推星合度以周天乘度分滿日度法得一為度不盡為  
餘命以牛前五度起算外星所合度也

求後合月以月數加入歲月以餘加月餘餘滿合月法  
得一月月不滿歲中即在其年滿去之有閏計焉餘為  
後年再滿在後二年金水加晨得夕加夕得晨也

求後合朔以朔大小餘數加合朔月大小餘其月餘上

成月者又加大餘二十九小餘一千四百一十九小餘  
滿日法從大餘命如前法

求後八月日入以月日日餘加入月日及餘餘滿日度  
法得一其前合朔小餘滿其虛分者去一日後小餘滿  
二千四百一十九以上去二十九日不滿去三十日其  
餘則後合八月日命以朔求後合度以度數及分如前  
合宿次命之

木晨與日合伏順十六日九十九萬七千八百三十二

分行星二度百七十九萬五千二百三十八分而晨見東方在日後順疾日行五十七分之十一五十七日行十一度順遲日行九分五十七日行九度而留不行二十七日而旋逆日行七分之一八十四日退十二度而復留二十七日復遲日行九分五十七日行九度而復順疾日行十一分五十七日行十一度在日前夕伏西方順十六日九十九萬七千八百三十二分行星二度百七十九萬五千二百三十八分而與日合凡一終三



百九十八日百九十九萬五千六百六十四分行星三十三度百四十七萬二千八百六十九分

火晨與日合伏七十二日百七十九萬二千六百一十五分行星五十六度百二十四萬九千三百四十五分而晨見東方在日後順日行二十三分之十四百八十四日行百一十二度更順遲日行十二分九十二日行四十八度而留不行十一日而旋逆日行六十二分之十七六十二日還十七度而復留十一日復順遲日行

十二分九十二日行四十八度而復疾日行十四分百八十四日行百一十二度在日前夕伏西方順七十二日百七十九萬二千六百一十五分行星五十六度百二十四萬九千三百四十五分而與日合凡一終七百八十日三百三十八萬五千二百三十分行星四百一十五度二百四十九萬八千六百九十分

土晨與日合伏十九日三百八十四萬七千六百七十五分半行星二度六百四十九萬一千一百二十一分

半而晨見東方在日後順行百七十二分之十三八十  
六日行六度半而留不行三十二日半而旋逆日行十  
七分之一百二日還六度而復留不行三十二日半復  
順日行十三分八十六日行六度半在日前夕伏西方  
順十九日三百八十四萬七千六百七十五分半行星  
二度六百四十九萬一千一百二十一分半而與日合  
凡一終三百七十八日六十七萬五千三百六十四分  
行星十二度五百九十六萬二千二百五十六分

金晨與日合伏六日還四度而晨見東方在日後而逆  
遲日行五分之三十日還六度留不行七日而旋順遲  
日行四十五分之三十三四十五日行三十三度而順  
疾日行一度九十一分之十四九十一日行百五度而  
順益疾日行一度九十一分之二十一九十一日行百  
一十二度在日後而晨伏東方順四十二日十九萬四  
千九百九十分行星五十二度十九萬四千九百九十  
分而與日合一合二百九十二日十九萬四千九百九

十分行星如之

金夕與日合伏順四十二日十九萬四千九百九十分  
行星五十二度十九萬四千九百九十分而夕見西方  
在日前順疾日行一度九十一分之二十一九十一日  
行百一十二度而更順遲日行一度十四分九十一日  
行百五度而順益遲日行四十五分之三十三四十五  
日行三十三度而留不行七日而旋逆日行五分之三  
十日退六度在日前夕伏西方逆六日退四度而與日

合凡再合一終五百八十四日三十八萬九千九百八十分行星如之

水晨與日合伏十一日退七度而晨見東方在日後逆疾一日退一度而留不行一日而旋順遲日行八分之七八日行七度而順疾日行一度十八分之四十八日行二十二度在日後晨伏東方順十八日二千三十四萬四千二百六十一分行星三十六度二千三十四萬四千二百六十一分而與日合凡一合五十七日二千



五星歷步術以法伏日度餘加星合日度餘滿日度法  
得一從全命如之前得星見日及度餘也以星行分母  
乘見度分如日度法得一分不盡半法以上亦得一而  
日加所行分分滿其母得一度逆順母不同以當行之  
母乘故分如故母而一當行分也留者承前逆則減之  
伏不盡度除斗分以行母為率分有損益前後相御  
凡五星行天遲疾留逆雖大率有常至犯守逆順難以  
術推月之行天猶有遲疾况五星乎唯日之行天有常



進退有率不遲不疾不外不內人君德也

求木合終歲數法以木日度法乘一木終之日內分周天除之即得也

求木合終合數法以木日度法乘周天滿紀法所得復以周天除之即得五星皆放此也

魏黃初元年十一月小己卯部首己亥歲十一月己卯朔旦冬至臣偉上

劉氏在蜀不見改歷當是仍用漢四分法吳中書令闕

澤受劉洪乾象法於東萊徐岳字公河故孫氏用乾象  
歷至於吳亡

晉武帝泰始元年有司奏王者祖氣而奉其闕終晉於  
五行之次應尚金金生於巳事於酉終於丑宜祖以酉  
日臘以丑日改景初歷為泰始歷奏可

史臣按鄒衍五德周為火行衍生在周時不容不知周  
氏行運且周之為歷年八百秦氏即有周之建國也周  
之火木其事易詳且五德更王唯有二家之說鄒衍以

相勝立體劉向以相生為義據以為言不得出此二家者假使即劉向之說周為木行秦氏代周改其行運若不相勝則克木者金相生則本實生火秦氏乃稱水德理非謬然斯則劉氏所證為不值矣臣以為張蒼雖是漢臣生與周接司秦柱下備覩圖書且秦雖滅學不廢術數則有周遺文雖不畢在據漢水行事非虛作賈誼取秦云漢土德蓋以是漢代秦詳論二說各有其義張蒼則以漢水勝周火廢秦不班五德賈誼則以漢土勝

秦水以秦為一代論秦漢雖殊而周為火一也然則相勝之義於事為長若同蒼黜秦則漢水魏土晉木宋金若同賈誼取秦則漢土魏木晉金宋火也難者云漢高斷蛇而神母夜哭云赤帝子殺白帝子然則漢非火而何斯又不然矣漢若為火則當云赤帝不宜云赤帝子也白帝子又何義況乎蓋由漢是土德土生乎火秦是水德水生乎金斯則漢以土為赤帝子秦以水德為白帝子也難者又曰向云五德相勝今復云土為赤帝子

何也答曰五行自有相勝之義自有相生之義不得以相勝廢相生相生廢相勝也相勝者以土勝水耳相生者土自火子義豈相關崔寔四人月令曰祖者道神黃帝之子曰累祖好遠遊死道路故祀以為道神合祖賦序曰漢用丙午魏用丁未晉用孟月之酉曰莫識祖之所由說者云祈請道神謂之祖有事於道者君子行後則列之於中路喪者將遷則稱名於階庭或云百代遠祖名諡彫滅墳塋不復存於銘表游魂不得託於廟祧

故以初歲良辰建華蓋揚綵旌將以招靈爽庶衆祖之  
來憑云爾

晉江左時侍中平原劉智推三百年斗歷改憲以為四  
分法三百年而減一日以百五十為度法三十七為斗  
分飾以浮說以扶其理江左中領軍琅邪王朔之以其  
上元歲在甲子善其術欲以九萬七千歲之甲子為開  
闢之始何承天云悼於立意者也景初日中晷景即用  
漢四分法是以漸就乖差其推五星則甚踈闊晉江左

以來更用乾象五星法以代之猶有前却

宋太祖頗好歷數太子率更令何承天私撰新法元嘉  
二十 years 上表曰臣授性頑惰少所闕解自昔幼年頗好  
歷數耽情注意迄於白首臣亡舅故祕書監徐廣素善  
其事有既往七曜歷每記其得失自太和至泰元之末  
四十許年臣因比歲考校至今又四十載故其疎密差  
會皆可知也夫圓極常動七曜運行離合去來雖有定  
勢以新故相涉自然有毫末之差連日累歲積微成著

是以虞書著欽若之典周易明治歷之訓言當順天以求合非為合以驗天也漢代雜候清臺以昏明中星課日所在雖不可見月盈則蝕必當其衝以月推日則躔次可知焉捨易而不為役心於難事此臣所不解也堯典云日永星火以正仲夏今季夏則火中又宵中星虛以殷仲秋今季秋則虛中爾來二千七百餘年以中星檢之所差二十七八度則堯冬令至日在須女十度左右也漢之太初歷冬至在牽牛初後漢四分及魏景初



法同在斗二十一臣以月蝕檢之則景初今之冬至應在斗十七又史官受詔以土圭測景考校二至差三日有餘從來積歲及交州所上檢其增減亦相符驗然則今之二至非天之二至也天之南日在斗十三四矣此則十九年七閏數微多差復改法易章則用算滋繁宜當隨時遷革以取其合案後漢志春分日長秋分日短差過半刻尋二分在二至之間而有長短因識春分近夏至故長秋分近冬至故短也楊偉不悟即用之上歷

表云自古及今凡諸歷數皆未能並已之妙何此不曉  
亦何以云是故臣更建元嘉歷以六百八為一紀半之  
為度法七十五為室分以建寅之月為歲首雨水為氣  
初以諸法閏餘一之歲為章首冬至從上三日五時日  
之所在移舊四度又月有遲疾合朔月蝕不在朔望亦  
非歷意也故元嘉皆以盈縮定其小餘以正朔望之日  
伏惟陛下允迪聖哲先天不違勛勞庶政寅亮鴻業究  
淵思於往籍探妙旨於未聞窮神知化罔不該覽是以

愚臣欣遇盛明効其管穴伏願以臣所上元嘉法下史官考其疎密若謬有可採庶或補正闕謬以備萬分詔曰何承天所陳殊有理據可付外詳之太史令錢樂之兼丞嚴粲奏曰太子率更令領國子博士何承天表更改元嘉歷法以月蝕檢今冬至日在斗十七以土圭測影知冬至已差三日詔使付外檢署以元嘉十一年被勅使考月蝕土圭測影檢署由來用偉景初法冬至之日日在斗二十一度少檢十一年七月十六日望日蝕

加時在卯到十五日四更二唱丑初始蝕到四唱蝕既在營室十五度末景初其日日在軫三度以月蝕所衝考之其日日應在翼十五度半又到十三年十二月十六日望月蝕加時在酉到亥初始食到一更三唱蝕既在鬼四度景初其日日在女三以衝考之其日日應在牛六度半又到十四年十二月十六日望月蝕加時在戌之半到二更四唱亥末始蝕到三更一唱食既在井三十八度景初其日日在斗二十五以衝考之其日日

應在斗二十二度半到十五年五月十五日望月蝕加  
時在戌其日月始生而已蝕光已生四分之一格在斗  
十六度許景初其日日在井二十四考取其衝其日日  
應在井二十又到十七年九月十六日望月蝕加時在  
子之少到十五日未二更一唱始蝕到三唱蝕十五分  
之十二格在昴一度半景初其日在房二以衝考之則  
其日日在氐十三度半凡此五蝕以月衝一百八十二  
度半考之冬至之日日並不在斗二十一度少並在斗

十七度半間悉如承天所上又去十一年起以土圭測  
景其年景初法十一月七日冬至前後陰不見影到十  
二年十一月十八日冬至其十五日影極長到十三年  
十一月二十九日冬至其二十六日影極長到十四年  
十一月十一日冬至其前後並陰不見到十五年十一  
月二十一日冬至十八日影極長到十六年十一月二  
日冬至其十月二十九日影極長到十七年十一月十  
三日冬至其十日影極長到十八年十一月二十五日

冬至二十一日影極長到十九年十一月六日冬至其  
三日影極長到二十年十一月十六日冬至其前後陰  
不見影尋校前後以影極長為冬至並差三日以月蝕  
檢日所在已差四度圭測影冬至又差三日今之冬  
至乃在斗十四間又如承天所上又承天法每月朔望  
及弦皆定大小餘於推交會時刻雖審皆用盈縮則月  
有頻三大頻二小比舊法殊為異舊日蝕不唯在朔亦  
有在晦及二日公羊傳所謂或失之前或失之後愚謂

此一條自宜仍舊員外散騎郎皮延宗又難承天若晦朔定大小餘紀首值盈則退一日便應以故歲之晦為新紀之首承天乃改新法依舊術不復每月定大小餘如延宗所難太史所上有司奏治歷改憲經國盛典爰及漢魏屢有變革良由術無常是取協當時方今皇猷載暉舊域尤被誠應綜覈晷度以播維新承天歷術合可施用宋二十二年普用元嘉歷詔可

宋書卷十二



宋書卷十二考證

歷志上甲寅紀第六交會差率十四萬八百五十九○

監本率下誤注闕字今從南本刪

滿氣法從小餘滿紀法從大餘○滿紀下監本脫法字

今從南本增入

推卦用事日○此條當提起另作一行

其冬下旬夕在張心暑也○  
臣永祚按句內必有誤字

今莫可考

推合朔交會月蝕入遲疾歷術以通周去之○周諸本

俱訛界今改正

清明注胃一半○監本脫半字今增入

小滿危

太弱

○危監本誤作亢今改正

以日所在為正○正監本訛作求今改正

伏不盡度○盡監本訛作書今改正

秦氏乃稱水德理非謬然斯則劉氏所證為不值矣○

臣永祚

按值當作直

賈誼取秦云漢土德蓋以是漢代秦○蓋諸本皆訛蓋  
今改正以字當在是字下

七十五為室分○臣永祚按室分即元嘉歷法所云度

起室二也

宋書卷十二考證